

BERITA HARIAN

DATE: 14/2/2010

Bina 1 Malaysia lebih kukuh, dinamik: Najib

Rakyat diminta contohi semangat Tahun Harimau

KUALA LUMPUR: Sempena Tahun Baru Cina yang disambut hari ini, Datuk Seri Najib Razak berharap semua rakyat Malaysia melihat hari muka dengan lebih optimis dan keazaman untuk membina 1Malaysia yang lebih kukuh dan dinamik.

"Ini adalah peluang untuk kita semua, sempena Tahun Harimau untuk menyerlahkan pencapaian, kelemahan dan cabaran peribadi dan keazaman untuk menjadi individu dan rakyat Malaysia yang lebih baik pada tahun akan datang.

"Rumah terbuka akan diadakan sebagai menandakan bermulanya Tahun Baru Cina dan selaras semangat 1Malaysia, saya menggalakkan semua rakyat Malaysia untuk turut meraikan sambutan ini dan menziarah rakan Cina anda sempena perayaan ini," kata Perdana Menteri dalam perutusan Tahun Baru Cina yang dikeluarkan di sini, semalam.

Beliau yang mengucapkan Selamat Tahun Baru Cina kepada semua kaum Cina Malaysia berkata, seperti sudah menjadi tradisi sejak berabad lamanya, masyarakat keturunan Cina akan memperkukuhkan ikatan kekeluargaan dengan mengadakan upacara makan besar, memberi hormat kepada anggota keluarga yang lebih tua dan mengeratkan lagi silaturahim.

"Kita perlu berani dan lebih berusaha untuk mengenali rakan kita dengan lebih baik dan juga perlu lebih dinamik dan komited di tempat kerja, bagi membolehkan kita memberi sumbangan le-



Rumah terbuka akan diadakan sebagai menandakan bermulanya Tahun Baru Cina dan selaras dengan semangat 1Malaysia..."

Najib Razak
Perdana Menteri

bih baik kepada masyarakat dan negara," katanya.

Najib berkata, mengikut zodiak Cina, Harimau melambangkan keberanian, optimisme dan kedinamikan dan mereka yang lahir pada tahun itu adalah pemimpin yang secara semula jadi adalah berani, kuat dan bersemangat tinggi.

Sementara itu, Timbalan Perdana Menteri, Tan Sri Muhyiddin Yassin dalam perutusannya, mengajak seluruh rakyat Malaysia agar terus bersatu padu demi mengekalkan keamanan dan kestabilan negara.

Sambil mengucapkan Selamat Menyambut Tahun Baru Cina kepada kaum Cina di negara ini, Muhyiddin berkata kepelbagaian agama dan kepercayaan yang diamalkan di negara ini tidak pernah menghalang rakyat untuk terus menikmati keharmonian.

"Malah ia menjadi faktor yang mendorong rakyat Malaysia untuk terus berganding bahu memastikan Malaysia aman damai dan sejahtera," katanya.

Sementara itu, Presiden MCA, Datuk Seri Ong Tee Keat yang membuat ucapan sama turut berharap kaum lain di Malaysia akan bersama-sama meraikan sambutan itu dalam semangat 1Malaysia.

"Sambutan Tahun Baru Cina tahun ini adalah Tahun Harimau, itu simbol kecerdasan berfikir dan bijak bertindak. Ia juga menjadi simbol kasih sayang, keberanian dan murah hati.

"Ini adalah tahun yang sempurna untuk melakukan perubahan. Sama seperti dengan ciri harimau, diharapkan kita sentiasa berdiri di kaki sendiri," katanya dalam perutusan Tahun Baru Cina yang akan disambut hari ini.

Presiden MIC, Datuk Seri S Samy Vellu, berkata Tahun Harimau akan memberikan 'ngau-man' permulaan bagi pemulihan ekonomi Malaysia akibat daripada krisis ekonomi tahun lalu.

Sambil mengucapkan Selamat Tahun Baru Cina, beliau berkata, 'harimau akan membawa aktiviti ekonomi, pelaburan dan peluang kerja baru untuk rakyat. - Bernama